

दिनांक : 30.01.2026

समय : 18.45 बजे

- प्रदेश मांय जर्जर ऐलाण करी ज्या अढाई हजार ऊं बत्ता स्कूल भवन पाड्या जावेला— 41 हजार ऊं बत्ता स्कूल भवनां री मरम्मत करायी जावेला।
- वोटर लिस्टां रा विशेष गहन पुनरीक्षण रा मुद्दा माथे विधानसभा मांय पख-विपख बीचे नोक-झोंक-सदन री कार्यवाही दो दफा टाळी ज्यी।
- प्रदेश मांय सरकारी मोल माथे गेहूं रा खरीद-बेचान सारू काल ऊं ऑनलाइन तरीका ऊं नाम मंडाया जा सकेला।
- इंडिया-एआई इम्पैक्ट शिखर सम्मेलन 16 ऊं 20 फरवरी ताई दिल्ली मांय राख्यो जावेला।

000

प्रदेश मांय जर्जर स्कूल भवनां री बेगी ई मरम्मत करायी जावेला। शिक्षा मंत्री मदन दिलावर विधानसभा मांय आज एक तारांकित सवाल रा जवाब मांय आ जाणकारी दीनी। वे बतायो के 30 लाख रुपया ऊं बत्ता खर्च री जरूरत वाळी स्कूलां री पी.डब्ल्यू.डी. री ओर ऊं थर्ड पार्टी ऑडिट करायी जावे है। शिक्षा मंत्री अगस्त 2025 मांय करायी ज्या सर्वे रो हवालो देता थकां कह्यो के प्रदेश री 3 हजार 768 स्कूलां रा भवन जर्जर हालत मांय है, ज्यां मांय ऊं 2 हजार 558 भवनां रे जर्जर व्हेवण रो ऐलाण कर दियो ज्यो है अर बाकी भवनां रा बारा मांय प्रक्रिया चाल रही है।

000

राज्य विधानसभा मांय विशेष गहन पुनरीक्षण -एसआईआर री प्रक्रिया रा बारा मांय ज़ोरदार हंगामो व्ह्यो। कांग्रेस रा विधायक जाकिर हुसैन शून्यकाल मांय ओ मुद्दो उठायो, तो संसदीय कार्य मंत्री जोगाराम पटेल ऐतराज करता थकां कह्यो के ओ मुद्दो विधानसभा मांय नी उठायो जा सके है। मंत्री री आपत्ति पाछे विपख रा नेता टीकाराम जूली कह्यो के सदस्य ने बोलण री मंजूरी स्पीकर दीनी है, जिण ने चुनौती नी दी जा सके है। वे साफ कीनो के विपख केवल आ जाणकारी छावे है के एसआईआर प्रक्रिया रे दौरान जो फार्म भरी ज्या वां री जांच करी जावेला या नी करी जावेला। ई बीचे पख-विपख रा सदस्यां बीचे तीखी नोक-झोंक व्ही। हंगामा रे कारण सदन री कार्यवाही पैली पांच मिनट अर वां पाछे आधा घंटा ताई टाळ दीरीजी। ई पाछे स्पीकर कह्यो के सदन मांय ई बारा मांय चर्चा करावण सारू वे जाणकारां री राय लेवेला।

000

मुख्यमंत्री भजनलाल शर्मा आज जयपुर मांय राजस्थान संपर्क पोर्टल हेल्पलाइन नम्बर 181 री जांच कीनी। वे हेल्पलाइन रे जरिये लोगां ऊं सीधी बातचीत कर र समस्यावां सुणी। श्री शर्मा कोटपूतली-बहरोड़, डूंगरपुर अर चूरू रा लोगां ऊं सर्टिफिकेट अर पट्टा जारी करण रा बारा मांय बातचीत कीनी अर अहलकारां ने इण ऊं जुड़ी परेशानियां तुरत आगी करण रा हुकम दीना।

000

लोकसभा अध्यक्ष ओम बिरला कह्यो है के आवता बजट अर सरकारी नीतियां रो मकसद हर गांव अर हर एक जणा ने खुशहाल बणावणो है। श्री बिरला आज कोटपूतली-बहरोड़ ज़िला रा कल्याणपुरा कुहाड़ा मांय श्री छांपाला वाला भैरुजी मिन्दर रा सालाना जळसा मांय बोल रह्या हा।

000

वित्त मंत्री निर्मला सीतारमण कानी ऊं 1 फरवरी ने पेश कर्या जावण वाळा बजट ऊं जनता ने घणी उम्मीदां हैं। पाली रा सरकारी मेडिकल कॉलेज रा डॉक्टर भोम सिंह बजट मांय मेडिकल कॉलेजां मांय पढ़ाई री फीस कम करण ऊं जुड्या ऐलाण री आस जतायी। वे गांवाई हलकां मांय डॉक्टरां री नुवी भर्तियां री जरूरत माथे ज़ोर दीनो।

000

प्रदेश मांय सिंयाळू साखां रा 2026-27 सीज़न मांय सरकारी मोल माथे गेहूं रा बेचान सारू काल ऊं ऑनलाइन तरीका ऊं नाम मंडाया जा सकेला। किसान खुद या ई-मित्र रे जरिये खाद्य अर नागरिक आपूर्ति विभाग रा पोर्टल माथे 25 जून ताई नाम मंडा सके है। केन्द्र सरकार गेहूं री खरीदी रो सरकारी मोल 2 हजार 585 रुपया प्रति क्विंटल राख्यो है। नाम मंडावण सारू अपडेटेड जन आधार कार्ड ज़रूरी है अर चुकारो किसान रा जनआधार ऊं जुड्या बैंक खाता मांय कर्यो

जावेला। राज्य मांय गेहूं री सरकारी मोल माथे खरीदी 10 मार्च ऊं 30 जून ताई चालेला। ई सारु प्रदेश मांय 383 खरीद केंद्र बणायी ज्या है। इण ऊं जुड़ी किण ई भांत री परेशानी आगी करण सारु मुफ्त नंबर 14435 माथे फोन कर्यो जा सके है।

000

इलेक्ट्रॉनिक्स अर सूचना प्रौद्योगिकी मंत्री अश्विनी वैष्णव कह्यो है के नई दिल्ली मांय व्हेवण वाळा इंडिया-एआई इम्पैक्ट शिखर सम्मेलन दुनिया मांय हाल ताई रो सब ऊं मोटो आर्टिफिशियल इंटेलिजेंस शिखर सम्मेलन व्हेला। वे आज नई दिल्ली मांय खबरनवीसां सागे बातचीत कर रह्या हा। श्री वैष्णव कह्यो के 16 ऊं 20 फरवरी ताई व्हेवण वाळा आर्टिफिशियल इंटेलिजेंस शिखर सम्मेलन मांय 100 ऊं बत्ता मुख्य कार्यकारी अधिकारी शामिल व्हेला।

000

राष्ट्रपिता महात्मा गांधी ने आज वां री बरसी रे मौके सिरधाभाव सागे याद करी ज्या। ई मौके राज्य मांय ई न्यारा-न्यारा कार्यक्रम राख्यी ज्या। जयपुर मांय मुख्यमंत्री भजनलाल शर्मा शासन सचिवालय मांय बापू री मूरत माथे सिरधा रा फूल चढाया और दो मिनट रो मौन राख र वां ने याद कीना। ई दौरान बापू रा पसन्दीदा भजन पेश करी ज्या। पाली मांय जिला कलेक्टर एल.एन. मंत्री अर फलौदी मांय जिला कलेक्टर श्वेता चौहान गांधीजी री तस्वीर माथे फूल चढाया। झुंझुनूं मांय एस.पी. बृजेश ज्योति उपाध्याय री मौजूदगी मांय पुलिस वाळा शहीदां रा मान मांय मौन राख्यो। भीलवाड़ा मांय राख्यी ज्यी श्रद्धांजलि सभा मांय बापू रा आदर्श ने याद करी ज्या। प्रदेश रा सरकारी दफ्तरां मांय ई संवारे ग्यारह बज्यां ऊं दो मिनट रो मौन राख र शहीदां ने याद करी ज्या।

000

पाली जिला मांय राष्ट्रीय कुष्ठ उन्मूलन दिवस रे मौके आज स्पर्श कुष्ठ जागरूकता अभियान सारु करी ज्यो। 13 फरवरी ताई चालण वाळा ई अभियान रा तैत जिला, ब्लॉक अर पंचायत लेवल माथे न्यारा-न्यारा कार्यक्रम राख्या जावेला। शहर रा बांगड़ कॉलेज मांय राख्यी ज्यी दो दिन री मल्टीमीडिया प्रदर्शनी रे दौरान लोगां ने कोढ़ री बीमारी रा बारा मांय जाणकारी दीरीजी अर इण ऊं जुड़ी गलतफहमियां आगी करीजी।

000

राज्य सरकार नागौर जिला मांय मेड़ता सिटी री कृषि उपज मण्डी मांय 5 नुवा किसान पथ बणावण सारु 5 करोड़ 60 लाख रुपया मंजूर कीना है। अ सड़कां बण जावण ऊं किसानां ने साखां मण्डी ताई पूगावण मांय आसानी व्हेला।

000

जैसलमेर मांय चाल रह्या मरु महोत्सव मांय लोक संस्कृति रा भांत-भांत रा रंग निज़र आ रह्या है। इण मांय राख्या जा रह्या कार्यक्रमां मांय देशी-परदेशी सैलाणी भाग ले रह्या है। महोत्सव मांय राख्यी जा रही होड़ां अर सांस्कृतिक कार्यक्रम सैलाणियां ने घणा लुभा रह्या है। पेश है म्हाणा जैसलमेर खबरनवीस री रपट-

000

केन्द्रीय संचार ब्यूरो री ओर ऊं पाली मांय लगायी ज्यी दो दिन री मल्टीमीडिया प्रदर्शनी आज पूरी व्हे गयी। इण रा समापन समारोह मांय खास पावणा सांसद पी.पी. चौधरी कह्यो के प्रधानमंत्री किसान सम्मान निधि ऊं रकम मिलण रे कारण किसानां सारु खाद-बीज री खरीदी आसान व्हे गयी है। सांसद नुवा श्रम कानूनां अर प्रधानमंत्री सूर्य घर मुफ्त बिजली योजना रा फायदां री ई जाणकारी दीनी।

000

जयपुर पुलिस ऑपरेशन 'क्लीन स्वीप' रा तैत लारला एक महीना मांय 80 लाख रुपया मोल री नशीली चीजां जब्त कीनी। विशेष पुलिस आयुक्त (ऑपरेशंस) राहुल प्रकाश आ जाणकारी दीनी। वे बतायो के ई महीना काल ताई एनडीपीएस कानून रा तैत 23 मामला दर्ज कर र 27 आरोपितां ने गिरफ्तार करी ज्या। गिरफ्तारशुदा आरोपितां रा कब्जा ऊं गांजा, अफीम, चरस, स्मैक अर एमडी बरामद करी ज्यी।

000